

gentium antiquissimarum, caput quintum de Iure Francico, Germanico & Gentium aliarum, ita, ut omnium Europæ gentium Iurisprudentiam simul exponeremus, sed etiam in ipsis capitibus paragraphorum numerum hinc inde adauximus, nouas addendo materias & de iisdem scriptores, ut maior exinde fructus caperetur rei litterariæ. Præcipue vero Iuris publici Bibliothecam in tantum adauximus, ut noua plane possit videri. Præterquam enim quod Scriptores etiam Iuris Publici gentium exterarum sistamus, plurimas materias speciales, etiam recentissimas suis locis inseruimus, ne quis pateat detectus. Errores quosdam qui irrepserant, emendaui, atque indices suppleui. Ultimam forsan hac editione manum & huic Iuris Bibliothecæ atque reliquis meis, impono, cum Historia atque Ius Publicum, quibus plenius me nunc deuoui, vix tantum temporis relinquunt in curas litterarias impendendi. Liberum itaque erit singulis, qui Reipublicæ litterariæ cupiunt prospicere, ea quæ merentur, emendare, vel ea in quibus defeci, supplere. Sancte profiteor, me hæc moleste non esse laturum, si modo debita adhibeat modestia, atque ipsi, qui mea emendare, meque erroris arguere conantur, satis fuerint conuicti.

## PRÆFATIO QVARTÆ EDITIONIS.

**O**pera, quæ in retractandis opusculis colloca-tur, nos sæpe numero a grauioribus reuocat, nec inchoare patitur, quæ publici iuris facere alias constitueramus. Hanc ob causam littera-